

四庫全書

集部

欽定四庫全書

少室山房集卷十七

明 胡應麟 撰

五言古詩二十八首

發中三子詩 有序

三子者劉參軍峻沈僕射約駱侍御賓王也  
孝標以流寓休文以宦遊賓王以起義出奔  
他郡迹三子始終無論隱侯即劉駱二君未

可以婺檠者第吾邦文學三子實首倡之則  
婺雖一日之過猶其湯沐矧其生于斯仕于  
斯沒于斯也夫休文達矣孝標賓王則窮迺  
其風節矯矯咸足重婺余既為白諸學使蘇  
公則復櫟括其檠並隱侯為三子之篇亦以  
余之窮有相類者匪曰氣味之合已也

嗟我婺女郡星斗垂寒芒寥寥曠千載氣運開齊梁劉  
生實天啓乳哺隨高堂翩然自北來煜若孤鳳凰讀書

紫微岫一目逾十行山棲表遠志絕交塵中腸千言走  
珠貝七錄披琳瑯含毫策錦被倏忽驚岩廊遂令世主  
忌坎壈終詞場龍蛇諒斯在鴻鵠詎可量矯矯七尺軀  
恥為萬乘降胡然際悍室妖北帝朝陽潛身嘆孤犢跛  
足追亡羊太息敬通論今古為傍徨

劉困于悍室輒軻  
終身常著論擬馮

敬通見史余  
每太息云

右劉參軍孝標

仙李方二葉九廟摧妖狐剝盡生靈宇內無完膚岳

岳臨海公奮袂起菰蘆義旗舉大澤百萬當一呼虹霓  
切雲漢雨澤滂泥塗操我七寸管問彼六尺孤片言嚇  
淫北一戰梟羣奴惜哉下阿戰倒甲如摧枯奇功固固  
立大義差足扶披緇入靈隱覓句酬跣趺金鉞隱博浪  
鉅軸流江湖固知藝文傑詎曰器識疎一辭道王辟無  
忝令伯徒至今讀遺草激懦開頑夫

略沒後詩文散逸  
郝雲卿蒐錄餘剩

梓之余別輯略  
氏忠孝傳詳載

右駱侍御賓王

六代更廢興，文士故不乏。奮迹驚才賢，乘時見髦傑。猗

歟沈隱侯，文章何烺烺。騁望遊中台，違情守東越。珮玉

辭岩廊，鳴金下閭闔。沿泳雙溪流，遲徊三洞穴。會圍臨

春風登臺望秋月

引沈原句

旌旆俄飛揚，劍履倏騰踏。一代

懷龍門，千秋仰驥秣。四聲啟後流，八病表先達。盡剖洪

荒秘，卓為藝林筏。儒生互雌黃，志士競鈇鉞。寥寥數千

載，風流竟誰越。豈伊腐草流塵土，共澌滅。

八咏綺習本非絕塵然四

聲之傳足

俟百世

右沈僕射休文

二懷詩

有序

二懷者張進士子同姜禪師德隱也一遯于仙  
一遯于釋固薦紳先生所不道然唐婺中詩流  
自駱丞而下必次及焉即調或卑卑固時代使  
然矣夫志和浮家霄上而休公駐錫川中蓋二  
君亦非老于婺者豈賢者避地自昔共然將詞  
人多窮迄今尚爾耶夫余亦有遠遊之思而未

得其挫名之術也故于二君咸沾沾有遐慕焉  
有唐迄元和時流尚不乏翩翩玄真子百代恣漁獵雅  
志游松喬奇蹤軌莊列塔爾柱下言超然謝津筏富貴  
輕鴻毛軒冕等澌沫一辭世主聘浮家老苔雪

右玄真子張志和

唐末緇流空休公岨然起卑卑局晚調兀兀吐玄旨冥  
心師楚圓苦思叶齊已禪啓天竺詮畫妙應真理片言  
忤大帥脫身錢塘汜一鉢游岷峨逍遙入無始

緇流談  
禪盛極



唐末然文彩頓乏矣休  
公直理入妙應真今傳

右禪月大師貫休

嫫七賢詩

有序

七賢皆嫫中先達宋元以來文學士也呂太史  
雖一代儒宗顧其實有不可盡泯者屈就茲列  
焉

於越稱上游嫫實文獻域唐末何式微宋南復中闢太  
史雖儒宗詞華蔚天植惜哉掩藝成端居聖門籍

右呂太史伯恭

同甫真人豪矯矯謝拘局寧為躍冶金肯作瓦金玉四  
上阜陵書十返紫陽牘至今華川陽英氣貫岳瀆

右陳狀元同父

與正頗負奇翩翩孝皇代作吏弘風流經國紀鄉遂世  
尊考亭疏迤掩干城銳細行誠足矜大德豈終累

右唐刺史與正

侍講起勝國舉代推詞場高蹤峙虞揭遺躅開宋王遂

令婺女顏光焰萬丈長

韓語惜哉駱劉緒緬邈空梁唐侍講

元倡宋王繼之然風雅一途猶三舍也

### 右黃侍講晉卿

文肅興閭閻揮毫走當代文事既淳泓儒宗亦映帶毫  
濡澌川洑研滌浦陽瀨一傳太史公粘天決千派

### 右柳文肅道傳

金華本學藪淵穎彌鏘鏘潛心事大業奮志遊羲皇一  
命詎足榮千秋在文章鷓鴣亦奚事腐鼠矜鸞凰

右吳山長立夫

元季多奇人出語必驚衆山川縱吞吐造物時簸弄魂  
夢遊玉樓敲推入醋甕嗟彼龍豹姿甘為鬼才用

右陳隱居君采

邑三賢詩

有序

余邑當宋元得賢者三人皆深於經術不可  
以文藝盡之迺其著述班班足考鏡也作三  
賢詩俾毋以質掩其文焉

濯濯香溪流汀洲雜蘭芷之子懷清芬南渡勃然起大

隱弘高風真修味玄旨遺文詎必多一臠見嚙矢

邑有文集

自茂明始今香溪舊刻尚傳

右范隱君茂明

吉父英雄姿夙負濟時略不受帝王知遂工賢聖學著  
述逾三車卧遊歷五岳至今尚典刑遺像儼丹腹

右金文安吉父

煌煌禮部公執戟隱金馬憐才若饑渴片善必揮洒餘

日酬詩歌居然振大雅世無揚子雲誰為好玄者

正傳  
著敬

鄉前後錄禮部詩話等  
編采擬故實勤至亡比

### 右吳禮部正傳

讀國初四君遺集

有序

文章國初越最盛越中婺最盛浦陽義烏金華  
三數君子者雖風調沿襲宋元而淳龐敦大蔚  
然開一代先李獻吉云金華數子真絕倫非溢  
語也詩歌稍左次當行亦往往有足觀者余讀

四君遺集慨然其人人為四韻以識余臆

猗與太史公振代見才傑百氏勤瑀鏤二典恣漁獵雄  
章發天造大手揚帝烈至今藝士林冠世推闕閱

右宋學士景瀛

忠文起草昧弱冠宣王猷雄才動宸宇大節揚蠻貊肝  
腸凜鐵石毛髮如懸疣巍巍文士烈熒熒垂千秋

右王忠文子充

奕奕空同生名家出華右雕龍擅制作繡虎威百獸才

啓北地先裔屬頽濱後遂令赤松頂峨眉鬱同秀

平仲頽濱

九世孫亦號空  
同子在獻吉前

### 右蘇內翰平仲

才賢萃吾婺仲子維吾宗雙溪濯蘅杜三洞捫芙蓉霜  
蹄繫百里天門恨九重寥寥信安集一巒窺良工

仲申所傳

信安集甚寥寥讀  
者不無遺恨云

### 右胡教授仲申

宋王二雋篇

有序



宋文獻有子曰遜王忠父有子曰紳各以少  
穎知名遜書法為國朝第一惜夭折中道而  
紳以孝行蔚然光紹先人皆匪可文藝一端  
盡者并識數語為二雋之篇

浦陽既龍躍華川亦鶩起有雛必九苞為駒日千里飛  
翰洒玉樓重繭歷金齒太息承家風寥寥墜蘭芷

仲珩書絕

少詩僅數篇王氏  
繼志集亦罕傳者

右宋遜王紳

存沒篇四首

有序

粵黎梁歐三子洎吾鄉子與方伯皆余忘年  
交也都門一別梁徐相繼下世僅黎歐存爰  
敘四子為存沒之篇

黎公產嶺表宛若荆山璞沉涵偕步兵滑稽類方朔一  
官寄長安十載卧玄閣悠然太古民相對忘寥廓

右黎秘書惟敬

嘉隆振雅道徐君實天縱翺翔五子間燦如九霄鳳維

昔平原館如澗為余頌  
倏為岱岳遊能無山陽慟

右徐方伯子與

熒熒歐楨伯人倫挺奇邁  
宦遊三十年囊惟一氈在大  
隱留金門遐踪寄塵外把臂  
慚後時論心迺前代

右歐博士楨伯

太息平生交梁鴻遂長夜憶  
昔長安遊屢命千里駕遺  
家鄰要離修文佐卜夏羅浮  
四百峰望爾涕交下

右梁內史思伯

寄吳門四子詩

有序

王承父屢訂余入訪烏鎮至則葭蕩茫然無  
復問津處過金閶適周公瑕與客遊天池泊  
崑山覓王世周寓婁江覓曹子念皆出謁所  
知矣遂各為一章寄焉

公瑕布衣俠夙習游鍾王珠璣耀千裔琬琰被八荒詩  
篇匪細事一一追三唐希聲豈諧俗太息雲門章

右周文學公瑕

東吳菰蘆中乃有如此人形骸若象罔富貴輕浮雲含  
毫後萬彙混迹游風塵笑我何太拙白首攻玄文

右王山人承父

曹生滑稽雄自稱子建後鬚髯河朔豪翰墨江左秀康  
伯惟令甥楊惲實賢舅為憶兩瑯琊哀涕泣清晝

右曹山人子念

藝士工浮儼末俗寡淳質自與王郎遊恍入華胥國錦  
里餘角巾臨邛有立壁一誦次公言千秋白虹泣

右王茂才世周

少室山房集卷十七

欽定四庫全書

少室山房集卷十八

明 胡應麟 撰

五言古詩一十九首

六公篇 有序

六公者高太史季迪李觀察獻吉何觀察仲默  
徐博士昌穀高參知子業李廉訪于鱗也其三  
洛下其二江左其一濟南總之上距國初下迄



弘靖詩家者流正宗巨擘盡矣余束髮寤寐諸君子讀其遺集恨不獲一當其人是秋舟過吳門欲入訪李迪昌毅故居而州民遂無識者蓋頽沒榛莽久矣嗟夫彼其盛名朗朗懸諸日月世代非遠河山邈如由後視今維今視昔俯仰宇宙能無悵然爰並李何四子為六公之篇後之同志或將有感於斯咏云爾

四傑起江左太史何琅琅一鳴駭萬鳥百中連雙鶴朱

絃奏上國白紵歌明堂遂令十葉後率土歸吳閭

謂嘉隆閭

右高太史季迪

河洛鍾人龍圖書倏輝映文起八代哀詩還四始盛坎  
壑雖當時靈光獨晚境突兀空同顛猶懷廣成問

獻吉  
年視

何徐輩獨高一時並起  
薛鄭熊高等皆無年云

右李觀察獻吉

嵩岳降英靈生申維仲默威鳳搏紫霄祥雲捧丹日得

歲劣陳思齊年過王勃今古三少成惜哉同六極

嘗謂古今

早慧而能大成者三  
君居最又不壽畧同

右何觀察仲默

斯人江左秀朗若披雲岑清風振玉珮白雪鳴瑤琴應  
劉夫前步陸謝無遺音太息談藝錄良工誠苦心

右徐博士昌穀

李何時中原顧盼失後輩高生稍晚出如澗倏興代清  
廟列尊彝中天落空翠咄嗟有盡年驟與飄風會

右高叅知子業

嘉隆建大業濟南實前茅含毫有八極聳翼無九霄遐  
心自皇古傲骨寧中朝至今蛾眉雪千仞留孤標

右李廉訪于鱗

五君咏

有序

丙戌歲王長公作重紀五子篇今復逝其二  
矣叅以余所知歐趙兩公為五君咏兩公亦  
司寇舊稱五子之二也

桓桓司馬公文武實天授大筆攄雲雷穹碑揭宇宙橫  
飛北地前獨步弁山後偉哉詞人場百代歸領袖

右汪司馬伯玉

明卿起南服東髮嫵聲詩一麾守嶺海三黜行羅施飛  
書問供奉鍊句追拾遺誰能竭大海盡出珊瑚枝

吳官  
使郎

嘗有詩懷  
李供奉

右吳叅知明卿

張公江海客卅角遊天朝霜蹄躡千里風翮搏九霄彩

毫建安席赤幟開元標遇我華陽館片諾成久要

右張中丞助父

嶺南維歐君儼若飲醇酒拙宦三十年工詩五千首黑  
髮遊中原白頭卧林藪惆悵蘭陰臺落日共揮手

右歐水部楨伯

矯矯趙司成風槩自天植胸腹羅星辰肺肝秉鐵石輪  
埋御史亭座首司寇席蔚為文士光寧彼九鼎力

右趙太史汝師

八哀詩

有序

八哀皆當世鉅公名流也昔杜陵咏八哀以李北海蘇司業之文學張相國嚴鄭公之政事李司空李大尉之勛勞李汝陽鄭司戶之才藝為次蓋通舉當代之烜赫者不必受知也若國朝名臣輩出嘉隆之際倍徙開元文學則有琅琊二王公政事則有若萬安朱公建寧滕公勲勞則有若銅梁張公定遠戚公

材藝則有若茂苑文公嶺表黎公不必曰通  
舉一代揆厥攸造視少陵所稱述無弗逮者  
或遠過焉有之余生也賤且年地懸絕諸公  
顧並當伯樂之盼即交有淺深受知一也爰  
效杜體為八哀之篇其文辭則瞠乎昔人後矣  
大司寇東吳王公世貞

洪荒忽中闢宇宙鍾人豪間氣五百年一旦開皇朝天  
挺瑯琊公河漢騎斗杓題詩惱玉帝謫籍遊塵囂肝腸



錯錦繡咳唾垂蘭苔胃吞太湖水筆湧耶溪濤九歲咏  
鳳凰十齡題寶刀十三作文賦十九搏青霄高才聚東  
井散秩同西曹廣心出皇古奮臂追前茅嗚呼薊門事  
大纛摧鳴臬倉黃別上國惕息還蓬蒿歸來卧窮巷削  
迹甘漁樵雄文鑿混沌大樂鳴英韶東瀛極滄海南紀  
逾銅標北冥亘沙漠西域窮荒要八埏走琬琰九域飛  
瓊瑤千金買隻字百鎰酬揮毫瑰辭匹墳典麗句駢風  
騷多聞失劉向捷給凌枚皋帝心亦簡在日夜馳干旄

東山乍一出被髮仍由巢竺乾叩真詮漆園明道遙香  
雲拂几席甘露流天瓢金棺下閻闔玉樹埋山坳中華  
折天柱下界聞鸞簫雙虬去廣漢八駿升宮堯玄丘見  
王母白雲和長謠乾坤失盟主海岳頽高標安得跨大  
鵬萬里隨神颺

太常東吳王公世懋

清河維哲昆頽川實難弟太常何英英二十誇謁帝雋  
聲走上國唾手拾巍第居然棗花萼燧並芙蓉蒂翩翻

擅綺藻韶瑩絕塵泥皎月懸春空朝霞豁晴霽朗朗屋  
百間虛舟了無繫振珮遊春曹詩篇驟名世標新見玄  
理汰俗起凡例縱橫信陽筏磊落濟南契憐才貫金石  
握手忘荼薺伊余實庸駑公也口不啻扞揚亘古今寄  
託深彌禘太息身後名孤憤千載計神遊貫八極江海  
窮鼓柁飛泉漱三疊大澤浮九滌徘徊華峰蓮厭飫閩  
嶺荔一紆太常綬清齋問真諦紫府繡丹經絳宮候飛  
履洪崖拍右肩金母拜左髻雲輦下五濁笙鶴遽追遞

龍蛇發丹竈雞犬入霞際  
虛疑老成喪坐惜典刑逝  
三嘆杜陵詩高才日凌替

大司空江右朱公衡

猗與大司空突兀起江右  
烜如匡廬顛羅列千萬岫  
弱冠登岩廊老宿推領袖  
功名迄自致建樹必高厚  
歷敬亘二紀盤錯靡不就  
嘉皇四十禩八荒慶在宥  
河流倏奔突淮泗若懸雷  
生靈困魚鼈巢窟雜猿狖  
大庭推司空僉曰惟夏后  
一麾出飛雲百神互馳驟  
鐵鎖纏支祈

金書勒史籀大澤疏洪濤長堤障罅竇三時督工匠百  
里並延袤留城距濟谷一一置封堠白馬沈宣房玄圭  
錫華胄平成在天地吐納偕宇宙擇言到芻蕘采納及  
蕪陋垂髻詫國士煦燠若懷袖深知大海量涓滴務兼  
受緬懷西山芝願紀南極壽胡為跨鶴羽羣真畢相候  
褒榮亘泉壤雨泣遍耆舊尚憶驅龍蛇至今貢橘袖明  
明大禹德負負絕前後

御史中丞閩中滕公伯輪

維三十六峰秀甲東南服篤生大中丞如海王百谷夙  
偕武夷君並主赤城錄沆瀣餐七臺明霞卧九曲一朝  
念黎元曳杖下雲陸孩提見異質儀羽何郁郁虎頭燕  
頷姿萬里飛食肉龍泉太阿鏑見者詎敢觸意氣千層  
霄襟次苞岳瀆皇王及帝霸一一悟正鵠居鄰紫陽宅  
先覺竊自淑剛嚴繼子厚方雅表正叔三十登熙朝歷  
塊徵驥駮嶺海行花封羅浮翫朝旭含香入銓省造請  
絕直牘當門忌蘭蒞故里藝松菊明主念舊勲飛詔起

林麓竭來柄文衡越士罄程督樓船汎滄海藍筍厯天  
目浩蕩窺人文豪英聽約束夜課三千徒朝薦十六族  
泰山納寸壤渤海收一掬伊余實駑蹇鹽車困馳逐顧  
盼超驪黃立貢千里足世輕園令金公擬卞和玉提攜  
洞底裡邂逅吐肝腹莪莪翠虛亭清燕幾迴矚禮數捐  
苛煩杯筯絕邊幅潢池忽中擾帝命馳大轟強弩橫錢  
塘朱旂鎮三竺威嚴控豪右字卹逮樵牧閭閻絕寇警  
倉廩發餘粟遂令全越氓比戶陰膏沐仰父仍俯子左

餐史右粥鑿鑿元戎疏宰司罄采錄方酬大賢績永顯  
儒效速胡為跨青鸞倏爾識妖鵬劇知勲庸盛翻訝日  
月促譬彼南陽龍盡瘁事興復一朝殞大星精爽尚肅  
肅緬懷澗中藻已拱墓傍木吞聲受恩士血泪盡痛哭  
先民失懿範遺統竟誰屬惟應聖門業永永耀斑竹

大司馬西蜀張公佳肖

張公產岷峨夙抱文武畧偉哉沈深度宛若未雕璞通  
籍遊皇都浩氣貫碧落出宰河陽縣解褐邁盤錯姦萌



起肘腋萬衆互駭愕一顧摧克渠勢若反掌握及乎任  
西曹亟闖五子幕大敵逢李王奮勇與之角遂登作者  
壇文譽不落莫功名浸昂盛歲月曠著作三關樹高牙  
敵膽懾沙漠嗚呼壬午事大手觀揮霍潢池舞鯁鱗白  
日走蜃鱷明廷塵南顧大吏咸塞縮維公奮臂出長虹  
耀千莫首刷閭閻憂六街靜鳴柝淵謀秘胸腹遠智運  
龍螭聲色了不動從容卧帷幄一朝令轅門羣小恣面  
縛纍纍九青兕一一就脯膺人懷顧復惠士有更生樂

武功既蕩平文事稍恢拓飛檄凌扶桑露布入平樂長  
裾曳曹丘敝屣接東郭帝嘉定邊勛飛詔下京洛本兵  
屬運籌九塞遵東約胡為殞長城驟失北門鑰迴思澌  
江涘單騎訪岩壑迂我錢塘郊恍忽共濠濮託我雍然  
音一代恣騰攫張公手  
書今存手迹宛若新足音遽寂寞矯首  
銅梁里大樹日蕭索

少保山東戚公繼光

嘉皇三十載薄海飛長鯨波濤蹴宇宙勢欲東南傾定

遠起列校巍然任彭黥鳴梟樹大纛東馬懸高旌轉戰  
日千里刁斗竟夜鳴天山破強敵白水殲驕兵三吳蹙  
徐海五嶺摧吳平初聞燧火息再覩潢池清七閩共尸  
祝儼若居神明武功固日揭文藝時潛精婁江謁廷  
尉蜀國遊中丞翩翩左司馬金石偕同聲飛揚將壇  
略跌宕詞苑盟隨車盡貌虎入幕俱豪英強敵躡西  
鄙高牙馳北平雙鞬絕大漠橫槊歌長征天山十月  
雪一劍無留行奪彼賀蘭山築我受降城勛高薄上

賞業就遺浮榮飄然策羸駟投袂辭神京參差武林  
驛遇我如生平恂恂見儒雅詎曰曼胡纓惜哉赤松  
遠丹砂邈難成悲來誦雙劍海岳迴光晶

余嘗為二  
公賦雙劍

之篇謂  
汪戚也

### 博士長洲文公彭

江左弘風流吳中盛才傑文章固挺出翰藻彌不乏長  
洲一散吏勢乃傾六合畫工啓南理書嗣京兆業餘工  
及篆隸一一皆卓絕新詩亦韶潤舊典多博涉蕭然卧

窮巷不減原憲俠徵求或匪人絹素劃中裂愧余生後  
時未及覩先達京華遇伯子忘年共頑頡真行嗣父風  
隸草變家閥雙鉤幻唐晉片楮貴燕粵尤工古印記珉  
玉浩森列龜螭兩京後科斗三代末澹宕杯酒間真致  
表疏越顧我何殷勤十指不停跋雲霞煥楮棟星斗爛  
筐篋龐年及上壽彭聃冀相埒倏爾乘化終飄然返六  
合遺蹟儼若新天路渺難越緬懷父子風老泪墮閭闔

前半敘徵仲太史余未及  
悟此公故因壽承及焉

秘書南海黎公民表

案業羅浮顛上有瑤石臺秘書起嶺表恍若登峩嵬古  
心亦古貌多藝仍多材悠然葛天氏醇朴逾嬰孩青衫  
困一第十上仍徘徊龍門實有策狗監嗟無媒匏瓜詎  
足係一命沾蓬萊拙宦三十年羽毛日摧頹風騷炳一  
念壯志浩不回高歌掩陸謝麗賦酬鄒枚梁歐日倡和  
王李時沿洄餘工入翰墨落紙皆瓊瑰龍章剪薤葉鳥  
迹行莓苔八分走夷貊四體攄雲雷邕斯有絕詣錯鉉

無兼裁緬思穆皇世京華盛游陪杯盃洞肝腹土木餘  
形骸橫當賀老盼謂我青蓮才三留激水棹十寄羅浮  
梅老成倏凋謝涕泗橫蒿萊

少室山房集卷十八

欽定四庫全書

少室山房集卷十九

明 胡應麟 撰

五言古詩五首

四知篇 有序

四知者歛汪司馬汝張中丞濠李通侯閩蘇參  
伯皆不佞生平知己之最也始余年十六遊長  
安邁萬安朱公賞識則惟寅業已上座延之中



國士兩瑯琊而伯玉司馬助父中丞咸以傾  
蓋定千秋之契暮途却掃則君禹以督學踵  
建安滕公至却鹵簿踐蓬蒿卑卑執問字之  
禮焉即余匪其人而四君子之知余允謂平  
生之最矣余既沒林莽為一蠹羣書間方憑  
藉諸先輩寵靈以自見異代而十載以還二  
王滕朱相率殞逝越三載而四君子又相率  
而繼之蓋不佞生平知己於是垂盡而老泪

臨風有不知其慟絕者卧病岩居永晝如歲  
詳述顛末為四知之篇於戲伯牙之絃自茲  
永絕而君苗筆研亡所用其焚如已矣

粵惟漢元封司馬兩當軸宇宙皆文章千載被芬馥明  
德洪唐虞朝舉十六族婁江泊新都一網盡推轂弇州  
既龍奮太函亦虎伏白晝臨高臺狂歌擊燕筑是時西  
曹彥年少四五六詩篇甚張皇文事稍局促丈夫志萬  
古不朽寧案牘經天緯地業九代喪空谷英雄倏相遇

羣起赴秦鹿上駟誰先登遺編在斑竹丘墳並典索乙  
夜朗披讀列莊孟荀韓檀左呂公穀先秦數作者鞭弭  
恣馳逐當其神理輳罔顧毫穎禿穹碑峙山陵巨碣控  
河瀆餘事拈風騷不脛走遐隩烟濤漲渤澥英聲振獯  
鬻騰身上將壇號令鬼神哭追奔極窮島蛟蜃碎屠戮  
華銘勒居胥京觀自天築八翼摩丹閣上謁九州牧帝  
命總六師長城倏如矗大蘇巡邊疆軍吏道匍匐安危  
係中外閩楚遍尸祝功成戒盛滿洞霄乞微祿戲彩娛

高堂孫枝競蹙鞠仙人鳳與麟園居各洗沐居公季孟  
間歲寒訂松菊製作頻賡酬緘裁遞往復交親劇杵臼  
調洽迴敵祝沾沾問蘭陰笑我甘韞匱相逢武林道傾  
蓋洞肝腹宛若平生懼坐久屢更僕床頭出雙劍光焰  
凜霜鏃感公思纏綿囊底叩餘蓄花生七百字草墜三  
十幅公時奮蒼髯誇我才萬斛眇論開醅醕清言佐饘  
粥乘興過弇山諸峰插平陸仙翁絕頂下執手道寒燠  
黃池挾日飲代興話濠濮巧匠無旁觀良工有預卜三

人坐丙夜相親互以目曾參唯曷疑季路諾庸宿含悽  
別英風衣袂盡滲漉迴瞻縹緲雲廣廈遽傾覆輕舟發  
嚴灘白榆訊孤獨兒童若走卒競指司馬屋公也聞余  
來傾筐倒屣麓將余入後堂明粧照羅幃推牛擘黃熊  
輿僮厭梁肉吳生歌落梅謝生辨幽菽憑陵屋如椽東  
歸記草木五噫序窮愁孤憤志幽鞠鴻章過十餘晨夕  
驟登錄炯炯噉名子藝苑對顰蹙余也百八章呻吟亦  
成軸河梁迄揮手泪眼暮簌簌寥天僅一柱靈光鎮大

麓將偕石羊君吾里永辟穀胡然跨飛鯨倏爾殘妖鵬  
空觀疑地文神遊恍天祿當年讀書臺闌干長首稽名  
已擅八荒聲猶借四服良哉副墨子百代稱郁郁惟公  
晚遇余盟契匪碌碌乾坤失遺老病骨祇盈掬舉頭拘  
翼宮鈞天醉秦穆山香舞未竟飛花墮如蹴知公究淨  
業不受轉輪福追隨無量壽永劫住西竺

右新都汪司馬伯玉七十三韻

明維嘉隆世率土皆琳瑯前茅奮厯郡大樹標婁江東

南並虎視河洛誰鷹揚張公起汝鄧九尺鬚眉蒼追風  
躍茲白掣電飛乘黃腰懸兩龍劍絕代俱干將燕臺際  
天起黃金矗華陽公年十八九掉臂排楓閭都人詫玉  
潤夾道觀河陽含香入建禮待漏趨明光明時甫釋褐  
吏部聊為郎青藜校中壘畫戟持東方一官等泡幻干  
劫寧存亡維時西曹雋六七爭騰驤分麾軼兩漢授甲  
陵三唐張公奮臂入操翰如長江流星控繁弱貫月浮  
餘皇金膏麗若木火齊明扶桑維揚怯旗鼓下雉靡旌

撞高牙矗梁苑巨蠹懸徐方  
眴眴絳灌目謗牘如螟蝗  
羣雄一網盡竄削盈遐方  
鹿冠挂玄武一笑騎天狼  
天風拂兩袖被髮還山岡  
淶波帶溼澗翠黛縈嵩印  
蘇門扣真諦王屋求仙方  
蒼生半眼熱薦辟交岩廊  
丹青遍畏壘無地潛庚桑  
驅車入函谷紫氣流咸陽  
瑯琊遇次美寮鞬畫相當  
曹劉偈鄴下蘇李酬河梁  
英詞錯金石逸調劇風霜  
庚辰計羣吏樞趨亦明堂  
伊余黑貂敝青衫卧蓬窻  
長安一傾蓋大叫呼元長  
名流本第一國士



元無雙潦倒南皮社分攜劇黃梁寥寥二十載復此聆  
篇章嘉隆數六子吾汝成高陽矯矯瑯琊鉢授衣命如  
蠻平原十日飲異味窮膏梁燕姬及趙女寒斃庖嘉魴  
雄譚走蠻觸劇論驚蜩蟾山川墮秀色宇宙迴精光帝  
心雅推轂大府開平涼飛書走北塞諭檄平西羌峨峨  
受降壁三城夾銀潢殊勲勒銅柱萬仞臨要荒華名既  
海岱鉅蹟仍疆場寧知息壤誓不救中山創功成合身  
退鳥盡知弓藏人生貴適志歲月如滄桑築宮近河渚

丹青儼成行金釵七十二如花簇銀缸赤松永辟穀大  
隗遙舂糧途逢廣成子餽藥盈筐箱時時發緘鯉詢我  
騎羣羊庸知兩孽豎作劇蝓膏育寥天逝雙鳥玉樓路  
茫茫丹臺易遷少要秩居文昌中原二三子振袂俱飛  
揚迴眸盼塵世鼯鼠跑空倉神州逐麟鳳阿閣馳鸞凰  
通都洎名岳百代留青緗濬沖復少達英風嗣王楊新  
聲播琬琰舊業呈圭璋雞羣覩野鶴意氣時昂昂佇看  
汝南族奕奕傳芬芳

右汝南張中丞助父六十八韻

於戲戰國後永絕原嘗風五侯洎七貴紈袴矜英雄岐  
陽本懿戚帶礪盟元功惟寅奮甲冑巨筆如長虹英英  
楚遊集弱冠推文通明霞傳兩頰皎日流雙瞳亭亭古  
玉樹百尺懸蒼空騰身起宿衛帝夢來飛熊晨趨景陽  
漏夕俛承明鐘餘晷輒賦詩高吟月腫朧前鑣逐濟上  
後乘馳江東丰姿寄朗潤句格諧纖穠憐才實天性下  
士惟謙沖門庭盛交際軒車沓雲鴻傾心放崇伯握髮

模姬公八荒並九域踴躍歸樊籠涓流赴溟渤尺土依  
衡崧逡巡抱一藝疇不懷登龍尤欣禮寒素率土皆吾  
宗華名譟遠近帝眷彌優崇陪京借管鑰瓜步羅滕矐  
江流照橫槊徹底瑩青銅長驅白門道夾路停花驄車  
前八騶列一笑卑王融夜登鳳凰臺詭浪青蓮翁糟丘  
亘阡陌雲車盍相從朱旗閃碣石七萃提兵鋒貔貅八  
十萬操戈候元戎月支奉舊朔日本祈新封狼烟絕張  
掖獵犬迴居庸胡床挾僚幕羽扇搖清風當筵盡珠履

金釵錯簾櫳時邀四方客大集華陽宮纖腰舞靜婉艷  
曲歌玲瓏慈恩結永夏景福逃殘冬西山四百寺寺寺  
懸詩筒賢勞動當宇寵渥流宸衷勛階埒師保晉接何  
從容三朝憲吉甫文武攀宗工登壇兩突兀推轂雙穹  
隆安危係中國絕徼傳精忠有如汾陽令華夏叨帡幪  
虵分匣寶劍烏盡弋良弓參差蕙苴謗一夕流彤彤欣  
然釋重負長嘯還隆中青門種瓜地五色開蒙茸閉關  
却人累習靜眠高舂食經減何屑飲量增盧仝交遊遍

宇內若箇娛幽悰維余二三子旦夕攜孤筇伊余夙邂逅  
近卅角遊新豐當塗一傾蓋拍手呼終童名篇誦池草  
繡句繡江楓君能汰禮法余亦忘踈慵深盟三十襪膠  
漆盤心胸河梁劇酬倡流水鳴絲桐將因畢婚嫁把袂  
尋韓終云胡玉棺下冉冉移空同死生竟長訣去住殊  
匆匆河山負猶昨九原邈難逢虛堂翳圖籍別牖扃笙  
鏞天池涸大澤日觀頽孤峰千秋信陵誼百代臨淮蹤  
吞聲遍韋布飲泣環章縫佳城甃白石馬鬣浮蒼松靈

虬逝天末，泪目懸孤蓬。雋聲逮嗣服，蘭桂逾羊葱。君看白雪調，奕世標芙蓉。

右盱眙李太保惟寅六十八韻

七臺高刺天，九滌迥浮日。真氣蟠山川，逢時異人出。矯矯蘇君禹，天才實飛逸。名宗自峨眉，源委繼洵軾。一目餘十行，填胸半紺帙。弱冠升賢書，閩士歸第一。講業嗤京房，窮經誚王弼。雋聲洽寓內，光焰難具悉。三呈大禮賦，彤庭授清秩。西曹擅文衡，前輩曾六七。居然躡其後。

功欲收蚌鷁督學來吾方神明朗無匹紛紜簿書數推  
案風雨疾吾鄉萬青衿手自標甲乙絳帷細雌黃百中  
副名實哀風遂一變彬彬有文質曰余抱沈冥廿載廢  
羸疾塵埃蔽行逕塞馬忘得失推誠却鹵簿逕草踏葛  
苾逡巡越三顧甕牖忍長室衣裳劇顛倒面貌恍親暱  
雄心貫今古風雅恣評隲揚馬枚曹流一一研學術燭  
花爛長筵丙夜互前膝千秋覈本支八代綜作述調合  
饒笙鏞情投銳膠漆君誠左太沖余愧皇甫謐河梁一



倡和乾坤對蕭瑟翩翩臨海丞仗義討兇泆邦人昧逆  
順背叛擬佛肸義激胡先生昌言鄭莊驛維君企英風  
罔待齒牙畢移文下州郡意氣迫逾溢祀典貽明神幽  
光播泉窟遂令談藝士赤幟樹高密爛如開玄黃儼爾  
脫桔桎君行五嶺遥余戀一丘佚美人隔蕪葭志士掩  
蓬華濠梁析莊惠疇為吐奇崛三秦豪傑徒強半坐捫  
虱去年聞子歸長齋事繡佛鑿度推盈虛元苞洞凶吉  
晨興得雙鯉渾身欲朏舉頭望赤松羊羣政堪叱言

尋十六天幔亭訪芝朮輕紅劈霞荔重翠剖霜橘甌寧  
拜滕師龍門莽崿律淒涼國士泪亂洒向溝洫古墓辭  
松楸新居問杭秫登君讀書堂卧君玄草室淋漓金叵  
羅燦爛銀不律斫地偕飛揚談天鬪真率三千大千界  
微塵固漏軼九十六聖君賢愚任陟黜落落雙干將星  
河翳蒙密舂糧十日期此會豈難必造物真小兒文章  
引媚嫉白雲乘帝鄉一老竟疇邱慟哭西州路風雷鼓  
寒栗屠龍絕朱泚窮鳥困趙壹玉樹摧庭階神理殊慘

慄惟應咸池秦萬古破蟋蟀

右溫陵蘇學使君禹六十二韻

孤憤篇挽王山人叔承八百字

有序

始余讀山人吳越諸遊草異之顧其人未識  
面也庚辰秋息駕杜門忽聞者以曹生書來  
稱山人往攜一刺入長安城亡所詣閉篋中  
廿載矣今特持以詣足下幸毋訝其漶滅也  
余亟倒屣出迓山人十日齋頭縱談風雅本

支流別殿最雌黃莫逆於心相視而笑人皆以山人不言備四時之氣余知其滑稽玩世大於東方也既與余訂盟江上明年余入弇泊舟垂虹問所謂十八橋者而太湖三萬頃浩渺亡際范張雞黍竟爽成言又明年余復入弇適山人躡草屨貿貿來迺長公病卒不起慟哭弇山之堂再信別去俄寄余手札千言情致委篤而五言一律云千秋詞苑劇萬

態筆鋒新以余綴詩數初成帙也後十載聞  
問中絕邇遣役詢諸吳門則山人墓木拱矣  
余不勝悼怛爰麤述爾時邂逅顛末做青蓮  
送魏萬體為五言古八百言而輟其三韻韻  
亡旁出者故也詩成致二子焚之几筵以告  
山人山人靈爽奕奕且擊節浩歌于大羅之上矣  
千秋布衣才往往專一壑窮年覓五字埒穿觀海若唐  
維襄陽孟間代推製作鬼峨洞庭句元氣攝林薄五季

宋及元餘音噪烏鵲非無二三子天授慙磊落有明盧  
柵氏騷些首恢拓途遵長卿轍步躡左徒躅幽鞠及擬  
招囹圄盛刪削詩歌遂非長風雅久寂寞茫茫鹿門緒  
一綫綴寥廓王生起菰蘆名姓早飛躍弱冠遊燕齊強  
齡走京索長懷濟時念雅抱經世畧無媒恥白玉草莽  
甘落魄禹穴緒圖書堯天弄畊鑿傲誕偕東方曼衍類  
南郭敢為蘭陵論偏究漆園學神來把觚翰六藝盡糟  
粕竦身出闕闡攘臂脫籬落四唐入經營六代佐伸縮

大篇競飛揚短什互沈著星河畫璀璨雷雨夕噴薄混  
沌迷雕鏤震旦困籠絡鏗鏘鸞鵠鳴突矯虎兕攫名姓  
聚倡樓老将鎮戎幕張公兩神物所向失盤錯太華三  
芙蓉秀色照廣莫懷中但一刺塵冠騎竹籜時無孔文  
舉竟爾徒入洛維時歲申酉芒鞋試行脚訪我蘭陰陌  
孤航載停泊披襟發長嘯搏帽吐清詭易水雙湛淪夷  
門兩嘍喑結交詎同裴登仙儼偕郭平原十日餘綠尊  
間翠杓微誠洩中夜萬古對斟酌明時邁何李天心寄


鳴鐸人豪瑯琊公乾坤縱揮霍繼起維奉常詞林創新  
獲斯文幸未喪大雅竟誰托吾意甘沈冥君才實磅礴  
無雙國士韓常勝冠軍霍鹿失餘中原龍騰絕大漠歷  
下窮高華成都侈宏博勉哉曹溪鉢毋令一士諤沈吟  
感子意踟躕復前却明燈徹曉漏撩亂燭花落倉皇嵇  
阮契竟爽范張約垂虹亭下浪浩淼阻越舶一別俄十  
霜邂逅弇山閣爾哀背欲鮒余瘦膝乘鶴吞聲話故舊  
喪逝捷飛霍起舞中自疑放歌久仍愕眷言懷故棲荏



再理歸索河梁白日墮一葦迅鷗鷺伊余骨伶俜念汝  
神矍鑠相期保玉體赤松問靈藥胡為兩豎子膏肓恣  
燔灼虛傳段璋句竟坐杜陵瘡生平褐衣貴不受帝王  
爵大鳥來滄溟神虬去碧落百身定奚贖九原亮難作  
嗟彼志與蝮牖下飽狐貉維汝賦頌聲巖嶮表衡霍居  
然布衣雄八面控繁弱修文亦地下玉樓富丘索遮須  
奉新盟眊遽赴前諾緬余昔遇汝臭味恍荃葍葍各  
諷詠妙理遞酬酢濠上迴周施江東析昉約朱絃斷流

水陽春咽冥漠荒阡月三尺破冢雲半擲參差迹已陳  
宛轉夢如昨夜臺覓青蓮攜手共杯勺老柏鳴鶴鷗枯  
松照熠爝談天悵鄒行擲地愴孫綽生芻愧晚暮永閑  
石門鑰白楊號悲風萬疊鬪蕭索崑崙眇何處南面醉

王樂



少室山房集卷十九

欽定四庫全書

集部

少室山房集卷

二十五至

詳校官編修臣程槐

侍讀臣孫球覆勘

總校官庶吉士臣何思鈞

校對官中書臣王鍾泰

謄錄監生臣卨颿

欽定四庫全書

少室山房集卷二十

明 胡應麟 撰

五言古詩四首

庚辰夏五月念之二日余三旬初度也碌碌塵  
土加以幽憂之疾靡克自樹俯仰今昔不勝  
感慨信筆抒懷六百字

浮生寄天地瞬息如風霆回首塵埃中倏已三十齡家

人慶初度漿酒羅前庭寧知志士懷百憂中坐并粵惟  
肅皇世婺女流星精休禎兆前夢抱送錫嘉名三冬學  
頗足抽翰預時英才非正平敵賦奪文考聲垂髻謁帝  
里弱冠棲神京散髮昭王臺萬象愁憑凌悲歌問屠狗  
擊筑偕荆卿郭隗豈佳士樂生徒老兵登高望幽薊長  
嘯盧龍營風吹大漠雪亂洒寥天青盛時方罷戰絕塞  
無王庭徒令終童策默默不得鳴蕭條對裋褐激烈投  
長纓飛書入詞社授簡羅替纓羣公競識面大匠遙尋

盟清談墮玉塵劇飲呼長鯨華陽莽空濶碣石高崢嶸  
千言照白日隻字懸青冥風塵一朝異聚散如流萍衣  
冠競祖道却出長安城含淒問歧路息駕還林垆袖中  
兩龍劍錯落埋寒星窮年卧深巷白眼橫柴荆時人不  
解識往往呼狂生咄嗟大運謬采藥尋仙靈脩然負瓢  
笠獨往事遐征絕壁聳天姥飛梁橫赤城千花鏡湖綠  
萬樹錢塘明金華最咫尺蘭陰窮絕陁道逢牧羊子恍  
忽黃初平將隨赤松去永與塵世冥寧知浣紗地物色

來娉婷飛揚靦前事佔畢起浮名低頭拂殘蠹眯目囊  
流螢雖勤伯樂顧豈投國士情匪乏鍾期知流水難為  
音遲迴十年內強半居敲傾雌黃逐兒輩粉黛隨優伶  
南宮籍初上東山意彌醒橫金亦何有拖玉非吾誠遂  
巡計偕歲屏迹留家庭為園寄莽蒼鑿沼浮清冷含菽  
奉高堂釀秫邀同盟芳春愴庭樹雪夜懷原鴿寧乖四  
方志實恐壯節零邁茲懸弧始涕泪摧生平戀舊迹已  
往感來念逾嬰昔居少年坐今為強者形容顏漸凋落



齒髮非神明千秋竟何以百歲詎足營筑筑六尺軀皇  
皇五鼎榮豈無箕山穴亦有谷口扃逝將守初服畢世  
窮遺經鴻裁列琬琰大業垂丹青藏書遍五嶽濯足凌  
滄溟却招兩黃鵠萬里還瑤京

憶在京洛遇鳴臯游契甚洽一別五載鳴臯既  
赴召玉京余亦輾軻家難偶祝生如華攜所  
業印正門下詩以勗之

昔余寓京華紅顏髮垂腰翩然遇祝生里閭同游遨矯

如長空鶴清唳聞九皋呻吟落珠貝咳唾飛璫瑤奇情  
兩突兀衣被長飄飄青箱破萬卷白眼持雙螯調笑謫  
仙人騎鯨墮煙霄悲傷杜陵叟二頃荒衡茅馬遷下蠶  
室相如因中消東方枉設難子雲徒解嘲造物真小兒  
役我隨塵囂黃土搏下愚茫茫若蜚螭南陽貴賓客什  
九橫金貂盜跖墓東陵高墳鬱嶢嶢伯夷餓西山腐骨  
湮蓬蒿陶朱竊西子黃金壓波濤屈原有何罪委身飼  
魚蛟為善福安厝為惡刑安逃長當畢吾願痛飲歌離

騷狂思捧北斗醉欲呼天瓢玉女令鼓瑟仙童使舖糟  
窮年許司命真宰為嗷嗷以茲訴上帝帝怒馳神颺雷  
公擊天鼓屏翳噓風潮青天拆龍劍易水寒蕭蕭吞聲  
出京洛洒泣沾河橋一與此生別三年隔東郊煌煌白  
玉樓倏已升宮堯山陽愴鄰笛玉洞聞鸞簫歸來潑川  
上一室藏鷓鴣俗子遍闌闌可人費招邀塵埃閉窮巷  
草色盈疎寮科頭誦四部赤腳繙細縹螭螟鑿止足偃  
鼠明逍遙皇天未悔禍家門日煎熬慈親悴霜露稚子

埋山椒晨北噪高堂孽狐瞰林巢戚戚類馮衍皇皇逾  
孝標人生亦何樂七尺徒煩勞逝將棄家室六合窮荒  
要翩然挾大鵬九萬騰扶搖嗟咨念良友宿草迷荒坳  
陽春慨永絕白雪空長謠懽言邁之子興文自垂髫飛  
揚慕古昔跌宕賢豪沾沾問奇字片語為神交斯文  
久淪謝玄閣長寥寥爾志亮金石遺風未全凋抽毫述  
往事贈汝為虔刀勗哉丈夫子努力追前茅

將入金華諸山述遊五十韻

昔我遊崑崙長嘯望玄圃手拍浮丘肩  
濩落還下土帝閻不可扣頻為世人侮  
蒼茫五龍躋旦夕無所伍飄風從東來  
吹我向齊魯徘徊岱宗側萬象劃爭吐  
遙空勢崔嵬大塊色消沮幽燕各羅列  
梁宋但仰俯龜蒙與鳧繹培塿不得數  
昏黑留天門海日正可覩白雲封中出  
片片墮梁父晨窺金銀闕玉珮遍廊廡  
警蹕懷祖龍鑿輿憶漢武調笑七十君  
空名竟何補荒碑亦磨滅遺跡半塵土  
迴首徠松亭亭尚堪撫恍惚秦時官蒼  
然大

夫五何來安期生相對形貌古攜我登雲車縱橫擘麟  
脯掀髯但一笑東瀛復斥鹵却下丈人峰行行至南楚  
鼓棹潯陽流吹簫洞庭浦三湘亘七澤茫茫散樓櫓放  
歌答魚龍懷才弔鸚鵡初聞黃鶴遊忽覩馮夷舞九疑  
何羊綿離立向平楚宛轉雙蛾眉慟哭摧肺腑萬古蒼  
梧雲不散黃陵澣緬思向衡岳改轍望岩戶裹足捫欽  
岑決策窮齟齬絕壁棲鸞鳳層巒櫻虬虎石留媧皇煉  
崖豁巨靈斧嵯峨大禹碣窈窕祝融府千峰既騰擲衆

壑亦旁午舉頭觸支機側身見河鼓海月明冠簪天星  
拂綦組竭來歸東臯屏迹偕溺沮薜荔交岩房蓬蒿翳  
環堵灌園事於陵飯牛狎五穀短褐歲載陰長鏡日卓  
午感激何時平形骸亦良苦咫尺金華山洞天列吾嫠  
霞氣連赤城霜華拂天姥石室函金書丹臺秘鴻譜瑶  
草紛可殮青精賸堪咀壯哉神秀區逝矣靈仙塢翩然  
羽翼生白晝還紫府

李生歸東陽益肆力千載手札寄余幾數十返

推挹過甚彌非所安報贈六百字

曰余抱遐尚念載卧玄閣逍遙榆枋下矢志遊廣莫一  
室羅青緗萬卷恣棲託門無問奇客與世久朽鑿匡牀  
起亭午髮散仍赤脚空齋垂藤蘿兀坐數花落苔痕閉  
重關何自來剝啄有美東陽生意氣本卓犖夙昔瑚璉  
姿弱齡自追琢上下三千年珠璣吐錯落雅志親典謨  
玄宗攬墳索莊騷逮左馬一一窮橐籥遠甘杜陵豪邁  
嚮弇州博矯首金華顛誰其嗣述作後起凌宋王先驅



併劉駱片刺懷十年名姓漸凋落願言申末契一過傾  
伯樂維日大火流空檐噪鳥雀清風惠然來瀟灑動林  
薄感汝纏綿意褊褊亦何惡倒屣迎嘉賓衣裳不遑著  
呼童割菘韭班荆坐籬落滌釜燭枯魚提壺勸清酌殷  
勤效明璫繾綣斟翠杓烏履何續紛觥籌亦交錯把臂  
游鴻濛懸心契冥漠歡來不知疲軟語間清詭淋漓契  
肝膽鄭重吐然諾雄文詫鸚鵡麗句誦鳩鵲狂歌發清  
商中夜互踴躍嗷嗷曼倩茵泯泯五鹿角典衣困鸕鷀

掩袂嘆龍護十載豐城劍漶漫斗文剝一朝遇張公紫  
氣貫碧落努力追前修遺編在先覺吾哀亦已久豪舉  
徒岳岳頭顱遽如許精爽漸銷鑠緬思少年日挾策走  
京洛荆山並韶潤姑射方綽約人驚士龍筆世許素豹  
學昔苞鸞鳳文今愧犬羊鞞薜荔懷佳人菰蘆憶高躅  
登門邁國士况乃同一壑萬斛吞餘皇千鈞控繁弱邈  
返蓋已傾縱橫思仍拓望望瑯琊雲瑤池斷笙鶴乾坤  
泣大老海岱遇韶箭典刑四部存巍巍見遺篚中原失

秦鹿上國誰宋鵲舊社紛摧頽新知乍忻樂照乘隋侯  
珠連城卞和璞平生實憐才見汝難落落酌汝青玻璃  
珮汝錦芍藥贈汝五色翰如虹跨寥廓汝實河宿精吾  
寧北海若小道未足觀大方詎難作激江一杯水彷彿  
共濠濮翩翩李公子毋爽代興約

少室山房集卷二十

欽定四庫全書

少室山房集卷二十一

明 胡應麟 撰

七言古八首

昔遊篇錢塘舟中作贈董觀察

秋風肅肅鴻雁鳴南斗參差北斗橫  
孤客迢迢過越水舊遊憔悴隔燕城  
燕城越水三千里憶昔聲華滿人耳  
藉草曾留太液旁看花誤入明光裏  
明光太液連西苑

往往遊人駐雕輦楊柳春風七貴門梧桐夜月諸王館  
王家貴里不相親聯裾握手盡詞人鳳凰原上題詩處  
鳩鵲宮前草賦晨紛紛冠蓋爭馳逐載酒籠燈過輦轂  
緩轡同看白玉京揚鞭醉入黃金屋秦箏趙管春不休  
歌聲繚繞碧雲愁香塵百里昌平道飛雪千門易水流  
五夜論心傳彩翰珠璣滿把皆堪羨衣袂揚揚逼九霄  
劍鋒耿耿流雙電誰言潘陸是才人肯與王楊作後塵  
格調迥追天寶上風期直與建安隣鑿坡鳳閣多相值

鐵券金貂總歡暱羣中忽覩三楚豪坐使瓊瑤驚四席  
秀冠繡服光陸離片語如金山可移暮攜奏草歸青瑣  
曉對封章下赤墀赤墀青瑣生風彩手握芙蓉珮蘭茝  
元禮聲華動闕庭陳登意氣傾湖海匆匆識面比南金  
慚愧論文契未深欲攜短刺通華館忽棹扁舟出漢陰  
荷衣蕙帶還鄉國回首交游成太息落日長歌玉樹詞  
浮雲遠蔽金臺色落日浮雲夢轉長却乘烟水下錢塘  
徘徊殿閣迷仙署寂寞川原望帝鄉帝鄉仙署空遼絕

何意輜軒到吳越欲向西湖訪畫圖  
慙辭北斗離閭闔  
雙峯縹緲插烟霄三竺蒼蒼引畫橋  
清風暗拂蘇堤柳  
壯氣平吞浙海潮  
謁來問訊蓬蒿士  
遠思幽情何楚楚  
短褐長裾謁上官  
麻鞋布襪從泥滓  
屈指并州幾故人  
嗟咨往事轉傷神  
虛傳異日山陰棹  
無復當時洛水春  
山陰洛水俱陳迹  
會見飛騰返京邑  
乍經薇省布陽和  
更上楓宸扶赤日  
幾年騏驎阨鹽車  
矯首長鳴氣不舒  
孫陽造父俱垂盼  
肯使竒才卧草廬



崑崙行送大司空朱公馳驛還豫章並呈唐太

常萬直指

君不見黃河之水來崑崙濁流萬里經龍門環嵩絕華  
不少息吞吐日月排乾坤天吳揚瀾九河溢大澤龍蛇  
起原隰洪荒不解堯舜憂平成却藉司空力自從大禹  
作司空百川四瀆俱朝宗鎖壓支祈鎮淮甸至今玉策  
垂神功國家定鼎幽燕北財賦實仰東南域河渠一線  
厓帝衷維時首賴平江伯二百年來飛輓傳肅皇之末

何遭連千艘莫進餉道阻臨朝南顧嗟羣臣我公崛起  
江之右列星顯化神明胄匡廬彭蠡毓精華西山南浦  
鍾竒秀早年通籍謁承明中歲翺翔漢兩京一朝起任  
虞庭事九官四岳咸推能沛渠已淤徐方塞巨浪滔天  
勢難遏兩岸洪波迫莫分百年故道誰能識神功實始  
南陽口夏村旣道留城走報國難將寵辱驚乘時大展  
經綸手櫛風沐雨卧不寧追逐魍魎驅玄冥八年胼胝  
勲績就青天不動黃流平東連揚子息江濤北望天津

散海潮車書萬國看王會玉帛羣方賀聖朝隆慶之中  
河再決帝謂元臣有遺烈一麾暫駐淮泗清風雷寂靜  
波濤絕飛廉導車屏翳從馮夷海若應潛蹤金書烏篆  
迹靈秘異時彷彿岫嶺峰大禹功高古來少姬旦才多  
心轉小門下爭看桃李榮車前肯使驂騑老紛紛制作  
懸丹霄馳驅阮陸追風騷元和文譽斗山重天寶才名  
今古豪三朝出入方垂注投簪忽擁南歸騎蒼生常恐  
謝公閒黃閣難留疏廣去樓船簫鼓出皇州錦纜牙樯

作勝遊羣公祖帳灞陵晚萬姓環看渭水秋迢遞關城  
望鄉邑浮雲漸送匡山色甃艤蘭舟水驛濱故老相逢  
話曾臆酒闌倚劍心飛揚語及前朝俱感傷丈夫報國  
志猶在星辰錯落雙干將旌旗明發川原阻著繡畫行  
誰與伍滕王閣上幾留賓孺子亭前頻弔古卽今廊廟  
求賢急肯使元勳卧黃石綠野堂開祇甃留終須勉為  
蒼生出五老東南勢轉尊三台佳氣正氤氳鸞箋倘遂  
浦輪到極目燕臺五色雲

時公與太常唐公燕澌水舟  
中卽席命余賦此凡六百八

十言

送朱可大還萬安

自從戰國更王風  
屈原師弟俱稱雄  
西京蘇李復繼作  
遺篇十九真宗工  
黃初七子各有得  
勃興杜李文章伯  
此道凌遲大厯還  
世代紛紛轉荆棘  
千年大雅幾茫然  
信陽北地何翩翩  
力剪榛蕪繼唐漢  
恍揭日月懸高天  
眼中作者難盡數  
夏玉敲金事竒古  
相逢海內俱賢豪  
奮迹前茅追步武  
看君意氣何昂藏  
十九謁帝趨明光

曾蟠萬卷破幽眇手鍊五色回天章藉其聲華滿京洛  
咫尺雲霄見孤鶴司馬仍傳太史書拾遺頗負襄陽學  
飄然遇我燕市中河梁邂逅雙飛龍高歌擊筑白虹斷  
劍花欲墮青芙蓉莽蒼風塵遽相別美人迢遞音容絕  
五年空覩芳草生萬里長看碧雲合雲泥自分隨升沉  
豈料重逢澌水濱咄嗟往事如夢寐解衣共拂京華塵  
五夜論文思逾壯濁酒淋漓對惆悵天地遲迴秉燭間  
星河磊落孤舟上眼看世變隨江河憫時憤事憂彌多

百川砥柱賴公等異時詎肯揚其波伯樂張華古難得  
時車斲斂圖南翼燕雀寧爭世上名蛟龍豈是池中物  
一朝變幻乘風霆磅礴六合摩崑崙卞和之玉詎三刑  
季子金多安足論高天黃葉連鄉國大鵬乘風度秋色  
短歌送汝不成聲握手臨歧淚沾臆千秋傑閣倚清沙  
百尺珠簾挂晚霞茲行定擬滕王賦一寄蘭州孺子家

幔亭雲氣歌為督學滕公作

君不見武夷之峯高挿天幔亭玉女騰蒼烟層巒列嶂

三十六相傳秦代巢真仙狂風怒號滄海立海水蹴日  
日欲沒峯頭雲霧長晦冥青虬赤鯉當晝集蓬萊東望  
若可招貝闕珠宮浮巨鰲紛紛群帝持絳節揚雷激電  
朝丹霄茲山形勢實竒絕紫氣迢迢亘吳越扶桑萬丈  
渤澥低齊州九點乾坤狹溪流屈曲環清沙緋桃夾岸  
蒸紅霞鸞鶴翔翔度空谷猿猱寂寂啼山家危岩絕磴  
倚石壁去天冉冉不盈尺仰視列星河漢垂下窺飛鳥  
松蘿黑藥爐經窟多遐蹤蘇門高步隨韓終霞光半落



錦繡座日色返射金銀宮仙居縹緲隔人世環珮飄颻  
落雲際半夜天鷄絕頂鳴清秋石馬凌空繫雜花幽草  
何芊綿松枝柏葉皆堪餐洞前三女不相待彷彿麻姑  
留翠鬟祝融梁父空鬱律太乙終南自騰擲遍觀豈若  
茲山竒寥泝清虛闕靈迹真人度世三千秋俯看人代  
如浮漚謁來欲濟生民困拂衣長嘯離丹丘金書玉檢  
秘空麓鶴馭鸞駢罷馳逐一朝乘蹻來東南手挽江河  
障平陸眼中軒冕如埃塵葛洪王遠時相聞清夢常隨

岩際月幽懷每逐洞中雲即今宇宙須真宰拭目經綸  
橫四海漫勞黃帝訪空同暫借庚桑居畏壘武夷山何  
蒼蒼真人下閭闔草木無輝光他時簪笏升岩廊致君  
堯舜追虞唐却駕白鹿還仙鄉天齊地久長無疆

題鐵幹回春圖山陰劉世儒工畫梅以巨幅贄

余乞詩為賦

吳綃七尺鋪寒玉幻出名花照幽獨微霜淡月春朦朧  
何處佳人卧空谷畫梅自昔傳華光擅竒更有王元章

千秋絹素漸零落古色黯黯留虛堂  
邇來劉生最殊絕十載含毫走燕越  
一榻常棲剡水雲雙帆忽下桐廬月  
看君落墨如有神解衣盤礴隨天真  
淋漓數筆生意動陰崖頃刻回陽春  
林危迥仄飛鳥絕偃蹇虬龍鎖深穴  
彷彿羅浮萬丈峯孤根倒挂千年雪  
大枝詰屈粘莓苔小枝蜿蜒花亂開  
競國蛾眉逞疎淡壽陽粧額矜徘徊  
風臺月觀遙相望園林更染孤山樣  
絕艷驚從漢苑來冰肌更出唐昌上  
吁嗟劉生畫已仙坐令鐵幹摩蒼烟

高屏巨障欲飛動素冊單條絕可憐長安五侯招不得  
王家珍重走書乞何緣好博胡生詩亂灑琳瑯向蓬華  
陰鏗不作何遜亡人間佳句何茫茫暗香疎影亦長語  
後來誰復傳篇章嗟余潦倒筆力弱細嚼瓊朶搜枯腸  
劉生劉生勿悽感自古高流混凡俗卽今且作瀟湘遊  
坐觀瀑布匡山麓他時問訊子猷船倘寄鷺溪三百幅  
舟次錢塘謁滕公值風雨夜作解所珮為寶劍

歌

江潮十月如山丘北風轍江江倒流星河一片落寒鐵  
暗中孽出蛟龍愁君不見豐城獄裡百鍊鋼精靈埋沒  
三千霜當時不遇雷與張至今神物終潛藏又不見曹  
沫手中三尺水却制桓侯輕管子一朝壇上行竒謀百  
代聲華耀青史胡生寶劍人不識十千買自邯鄲邑竭  
來持贈歸滕公繞座虹光流四壁憶昔干將初鑄時睥  
睨歐冶麾風胡低迴天地鍊精氣噴溥宇宙烹洪鑪泰  
山為鐔渤海缺神鋒指石石欲裂綠柄猶沾苔蘚文亦

花半墮芙蓉匣有時夜嘯風雨聲千夫辟易萬馬驚山  
中烟麴晝摧絕水底鯨螭寒不鳴湛盧飛景亦凡俗純  
鉤巨闕皆碌碌取次橫裁麗水金紛紜碎割昆吾玉一  
揮四國如建瓴挽回日月轟雷霆朝攜赤堇鬼神伏暮  
宿蒼梧濤浪青荆軻孺子本無術匕首蒼皇挑強敵片  
言枉殺樊將軍易水悲風轉烏邑項王智力何豪雄廢  
書苦學仍無功垓下誰知萬人敵時哉不利嗟重瞳豈  
若胡生磨此劍寸心耿耿橫孤電十年坎壈意不平提

與滕公肝膽見滕公豪氣凌穹蒼一朝覩此神飛揚願  
持此物登朝堂時時拂拭生秋霜蚩尤遁迹魑魅藏周  
遊八極還大荒

虔州歌送太中丞江公之南贛

東南海色何蒼蒼旌旗夾岸澄清光迢迢斧鉞自天下  
帝遣中丞巡朔方銅符玉帳分千里畫甲雕鞍圍綉綺  
三軍鼙鼓寂無聲萬竈風烟晴不起中丞自是河宿精  
乍窺人世辭蓬瀛流沙咫尺不可越怒鞭海若驅長鯨

停車忽傍黃山麓笑揖浮丘跨靈鹿曉逐霞光度赤城  
暮餐雲氣離天目胸中遠思凌沆瀣却來湖海稱人豪  
單詞隻語露肝膽白日不動蒼旻高猿貍豹畧多竒跡  
早握兵符窮戰術八陣常翻魚復圖千言自獻龍門策  
策名飛步登皇州紛紛簪筆皆儒流斗邊夜嘯霍龍劍  
天上春開五鳳樓賈生意氣本英發終軍才調何穎脫  
兵鋒直欲款匈奴尺組恒思繫南粵華袞朱軒出未央  
竹馬壺漿迓道傍已見褰裳臨薊野還看賜服下南陽



再歲超遷左馮翊鳳凰神雀咸來集聲名從此播寰區  
二省三臺勞涉歷東南財賦日徬徨一麾承詔來餘杭  
唐代征輸屬劉晏漢家平準羞弘羊政成績奏多清燕  
越水吳山自游翫酌酒初登武穆祠飛書忽下明光殿  
匆匆督府推賢臣九重煥爛傳絲綸西黎庶望充國  
河內軍民嗟寇恂虔州形勢本四塞渺渺川原開郡邑  
波濤半蹴閩海青瘴癘斜連惠潮黑汀漳諸府列犬牙  
紆紫四省藏千家窮鄉絕峒鑠魑魅深岩大澤盤龍蛇

廟堂撫髀思經濟時來崛起風塵際三苗方畧從便宜  
九姓羌渾隨節制軒車雜遝送離觴十月江城滿路霜  
大將樓船橫浙水元戎隊伍出錢塘錢塘浙水俱秋色  
回首嚴陵瞻故國白岳峻嶒帶雨寒蒼巖兀突齊雲立  
雲岩白岳望不停番陽彭蠡江漠漠千年滕閣迷丹嶂  
萬仞匡廬削翠屏歷歷關河度章浦緩轡停驂問風土  
送客應過孺子亭提兵却入中丞府中丞號令何雄哉  
指揮叱咤行風雷將軍列戍秦城遠壯士長歌漢壁開

建牙吹角觀游獵士氣軍聲騰百粵鐵馬驕嘶海月寒  
琱戈乍舉岩雲裂海月岩雲壯品題登壇橫槩思清淒  
慷慨寧論班定遠風流不減庾征西緩帶時時臨絕域  
綸巾羽扇何閒寂驃騎空馳大漠烟詞人枉勒燕然石  
崔巍銅柱鎮封提縹緲珠崖接五溪分耕坐使陽春布  
講武俄省太白低講武分耕嚴紀律瀘夷永靖先零輯  
主恩時賜鷩袍兵氣潛消狐兔窟津亭黃葉轉紛紛  
腸斷驪駒不可聞晚思蒼茫盈落日愁心悽切駐寒雲

男兒意態元磊落抗手何須怨離索指日威名虎豹關  
他時事業麒麟閣雨露沾濡大海濱谿山隨處淨烟塵  
更令文字流荒服行見衣冠入紫宸

題黃初平叱石圖

古木蒼藤挂風雨白石峨峨洞門倚黃家兒曹不解事  
叱作羣羊遍空起胡生較汝差長年俯窺五岳石五拳  
他時一叱五羊起白雲飛盡羅浮巔

少室山房集卷二十一

欽定四庫全書

少室山房集卷二十二

明 胡應麟 撰

七言古詩九首

題何仁仲甘露園 有序

何氏之先絲開創勲世襲金紫至司寇公遷  
詞章學術重宇內仁仲其仲子也幼受業家  
君弱冠名家詩賦茲繪其所構林亭千里索

和余弗獲辭

園林舊說何將軍應門稚子俱能文即今盛世寧好武  
登壇載覩鴻臚君別起樓臺眺三楚冠蓋章華總非伍  
九疑七澤天茫茫千秋屈宋垂文章何日玄亭借高卧  
乘風會鼓瀟湘柁

梅憲歌壽何處士作

吾聞羅浮之山四萬八千丈絕頂仙葩隔塵壤鐵幹斜  
撐大海濱霜梢亂挿遙天上江南十月寒信來雪花如

席飛瑤臺千枝萬枝凍欲折凌風一樹何竒哉清標雅  
質真絕俗為誰移向孤山麓東閣曾聞杜陵句西湖更  
入林逋目道人自是姑射仙幾年采藥羅浮巔參差老  
態看不足却窺春色來湖邊滿屋琳瑯坐相對五夜虛  
窻月光碎夜永寧知素影單酣歌絕勝紅粧醉縞衣鶴  
氈何翩翩况有逸思凌開元有時興到起濡墨陰鏗何  
遜皆陳言只今尚作梅花主甲子一周還二紀山房乍  
夜春意回彷彿枝頭聞翠羽綉屏朱戶羅嬋娟孫枝遶

膝才且賢折花浸酒為翁壽清香習習來華筵王母安  
期世誰識玉桃丹棗空陳迹豈若冰肌耐歲寒破牕含  
春映朝日梅窻叟且莫吟繁苞落羌笛國豔傳幽琴遙  
望羅浮隔南粵玉宇雕梁迥清絕聳身欲去重徘徊冉  
冉雲駟下天末且揮白鶴留人寰幾番渤海成桑田更  
卧梅花三百年一筇長嘯凌蒼烟

褒忠祠祀禮成代直指蕭公作

一夜并州赤龍起浩蕩風塵播疆宇捲甲朝降十萬師



懸烽夕照三千里真主初還建業東儲君却下金陵宮  
羣臣駢首甘就戮至今正氣吞長虹憶昔齊黃在帷幄  
首繫親王入京洛書生坐失應變機遂使貔貅暗沙漠  
同時抗節練與陳壯懷凜凜雄三軍偉哉正學十族死  
精貫日月開浮雲全師僅見南陽鐵獨守危城破堅甲  
暴昭姚善兩激昂視死如歸狗銖鉞皇皇周子百鍊鋼  
題詩自縊太學堂景清枉劾漸離術勢孤不得抽魚腸  
紛紛義士難悉數力挽頽波示今古投河直欲拒成湯

扣馬寧辭諫周武大厦難將一木支江城白晝飛旌旗  
鄩南正位大統集劔閣巡行天命移沉吟往事空憤切  
耿耿英魂豈終滅四海同悲東市刑曠代猶瞻首陽烈  
百年祀典何寥寥明良繼起登熙朝首錄忠誠建祠宇  
天書五色垂丹霄峨峨遺像表忠赤報禮殷勤慰悽惻  
西日含窻鳥自過北風吹樹聲猶急陰蟲夜促霜露零  
群公恍惚來精靈九原遺恨豈堪說天空月落秋冥冥  
我行覩此重太息後世誰傳董狐筆海濱義士何足論

洛邑頑民真再出英英壯氣摩乾坤流光竹帛垂丹青  
千秋萬代鑒徃轍君臣大義如日星於戲君臣大義如  
日星

河洛篇督學滕公夜邀齋中談道命賦

茫茫太始誰開闢耿耿元精貫三極自從河洛生圖書  
中華首肇文明迹羲皇手抉天地心羅列八卦標乾坤  
軒農堯舜復繼出垂衣萬古開人文夏商體格多渾噩  
遺風未散鴻蒙樸成周一代首尚文緯地經天傳制作

紛紛侯國隳王綱宣尼崛起稱素王七十二表擅靈異  
駿逐五帝馳三皇神遊岱宗憇梁父下瞰日月相吞吐  
三千弟子咸樞趨從此儒冠盛東魯窮年贊易評義周  
詩書禮樂勤刪脩至今大盜屏不發凜凜鈇鉞嚴春秋  
淵輿資稟實玄奧獨冠諸生聞至道惟時游夏得精華  
散入南方布文教遊梁崛起孟氏賢乘車列鼎何翩翩  
公孫萬章不足數岩岩氣象誰其傳荀卿議論本該博  
時平廢死蘭陵郭後來蜀國空草玄白首蒼黃墜高閣

河汾自是王佐才曳裾獻策窺蓬萊昌黎夙負斗山望  
路途二鳥重低徊十年至道轉寥落重見周程起濂洛  
紫陽之巔異人出一掃秦蕪繼絕學我明設教崇成均  
十三學政分儒臣七經訓詁行海宇彷彿雲漢垂星辰  
關中江右兩督學景明獻吉真間作才名氣節天下傳  
渺渺斯文未有託武夷之山何嶙峋丹梯百尺連高旻  
我師篤生任斯道挽回一髮伸千鈞周情孔思實天縱  
玉質金相本梁棟年少親承明主知時來却為蒼生用

三吳才士集如雲帝遣真儒下漢庭伏生晁錯豈知道  
丁寬孟喜空談經一麾暫駐吳山麓已見清風走南服  
坐席江聲走具區褰帷海色明天目魯國生徒遍品題  
當筵彩筆飄虹霓漫擬真人過函谷共看夫子在關西  
王良造父本精識雷煥張華渺難及臺上俄看萬馬空  
獄中解使雙龍出麟符綉鉞行高秋追步琬琰披琳球  
縱橫禮樂三千士縹緲絃歌十二州絃歌禮樂連薇省  
片善微長勞接引百川齊赴滄海流抔土同登太行嶺

泗水尼山迹未湮升堂入室多奇珍西施尚作浣紗女  
和氏猶為抱璞人馬卿自昔工鉛槧終軍意氣空凌亂  
照乘連城世所希夜光明月誰能辨葱葱紫氣繞三臺  
遙見徵書落上台更聞黃閣收桃李會看青衿出草萊

董生行贈中秘董體仁

遠遊昔登梁父巔天門突兀摩蒼烟秦碑漢碣半寥落  
萬家封禪俱茫然憶從蒼頡制文字六書燦爛星辰懸  
八百年來陽冰死邕斯體製誰其傳董生今年政三十

曳裾笑指長安日論心遇我遊俠場意氣翩翩指金石  
自言家住滄海東曾入禹穴探竒蹤門外寒山掛蒼玉  
青天削出霞芙蓉竭來挾瑟齊門老客子形容半枯槁  
黃金臺館天茫茫擊筑悲歌和窮鳥興到長鑄石鼓文  
快劍長戟秋森森突兀虬龍起幽壑翔翔鸞鵠迴高林  
金薤琳琅徧筐篋畫蟲書互驚絕白石烟銷苔蘚凝  
寒雲海凍珊瑚裂年來徵仲數八分長沙小篆稱通神  
生也雕蟲不自惜往往制作追前人偏傍頗肖韓擇木



風格時兼蔡有鄰十載都門困旅食短衣匹馬隨風塵  
吁嗟董生何僕僕歸去猶堪友麋鹿攜尊傍我吳山麓  
飽看秋潮落天目

霞林樵隱歌為梁太學賦

七閩孕竒秀秀出壺公山壺公懸壺住絕頂雲霞萬疊  
供朝飧玉宇瓊樓架天末翠葆丹旂互明滅高寒可望  
不可親一片晴光墮林樾林中大隱梁伯鸞飛身直上  
凌巔岩蒼精之龍不肯佩却從杜甫歌長鏡長鏡朝持

柄白木伐木丁丁向空谷竦身乍可親猿猴跂足時堪  
友麋鹿峰迴岫轉興不窮壺公絕頂尋壺公高霞萬疊  
餐不盡擔頭五色紛葱龍荷擔歸來石床畔兩腋風生  
體輕健金莖底事月底尋石髓無勞洞中翫君不見赤  
城之下吾所廬霞標突兀千仞餘興公麗賦久埋沒桃  
花流水空踟躕又不見武夷之蹊君咫尺霞幔為亭駐  
征蹕天孫懶織雲錦裳邂逅梯仙竟誰識願君大隱留  
人間長林築室三千年春來倘挾汝南費一筇歷探壺

中天

七閩之秀實惟壺公丹霞如樓迥出天半梁太學  
維築室其下將終身焉屠長卿為題曰霞林樵隱

而陳季相乞余長歌以  
紀之余不獲辭賦焉

夜飲喻邦相署中酒酣邦相諸郎君出見咸朗

朗玉立可念也因戲成短歌一章為贈

自從管鮑交游不再見世人結交徒結面南昌喻侯青  
雲客邂逅逢余偏戀戀丈夫意氣凌青冥契合寧論越  
與秦弟兄異姓古來有一呼盡出諸郎君大兒今年纔  
十二霜毫日掃五千字差肩兩郎亦其匹八法淋漓照

湘帙抱中小者尤絕竒玉為肌骨雲為眉毛詩三百不  
離口氣槩似欲吞虹霓看君四子並英物朗朗寒空挂  
奎壁徐卿兩兒那得比王氏三珠總非敵人生有兒百  
不憂况復滿眼俱駢騶喬當及卿髦詎減謔既難兄紀  
更優君不見胡生今年政三十日夜明珠探驪窟大兒  
文舉小德祖徒爾相親不相識此時盡閱君諸郎使我  
臨風重悽惻謂生好飲勿復言且盡三百青銅錢生兒  
蚤晚會有命何用蹙蹙愁心顏君不見喻侯膝下四男

子行年三十初得此至今玉樹森庭廡

鍾室行題淮陰侯傳後有序

淮陰侯不反明矣而史遷附會獄辭致千載  
之下徒惜其功大而不克終且歸罪於呂氏  
呂氏固漢祖所託而甘心者也漢於當時所  
畏惟籍與信籍滅而信繼之時事必至無可  
言者彼陳兵之構舍人之訴皆漢之為也信  
亡即庸庸如越猶以故智除之誅越以速布

之死而漢之謀無不效矣於是以懟如陵椎  
如勃者而以後事付之然且曰陳平智有餘  
難獨任也嗚呼漢之心可識矣

黃河倒流日東轉地坼天摧鍾室晚志士千秋空扼腕  
誰為淮陰明不反憶提利劍追重瞳遊關前隆準公  
登壇片語定劉項豈須垓下知雌雄井陘戰血飛長虹  
齊城七十如飄風當時楚漢在掌握磊落千言辭蒯通  
固陵長驅三十萬手挈神器歸真龍泰山為礪河為帶

欲齊伊呂稱元功寧知隆準猜忘主畏信雄圖如畏羽  
旌旗夜入定陶壁警蹕朝行雲夢渚朝行雲夢夕出迎  
天日可照微臣情縱虎誠難縛虎易青冥咫尺飛雷霆  
列侯朝請亦奚忌隱若大澤居長鯨陳旆相過理則有  
舍人上變誰當明遂令身首異都市九族併命咸陽城  
嗟嗟呂姥豈辦此固知漢主行叮嚀卽旆不反信亦族  
欲加以罪寧無名嗚呼李也實涼德萬古愁雲吊鍾室  
史臣徒贊寬大辭百代梟雄定誰匹君不見三雄死三

呂立則中愛姬人作翫掌上佳兒血盈席天道好還如  
一日長信宮深辟陽入愧殺長陵一抔土冢中強魄無  
顏色君不見亞父當年賜骸骨虞姬効死陰陵側壯士  
至今猶悼惜千秋為季寧為籍嗟乎千秋為季寧為籍  
吳章兩門士後先以新作至咸精進迥出余讀  
之勗之以歌

吳充遠示林屋詩讀之使我興飛越沾沾欲度驂騑前  
不減觀潮誦枚發章生近投詩百篇敏而好學吾所憐



昌齡我師花蓋婦肯與王建論媼妍何哉世謂兩生魯  
中夜聞雞解起舞異日英雄起儔伍不用登臨嘆廣武

少室山房集卷二十二